



الجامعة التكنولوجية  
UNIVERSITI  
TEKNOLOGI  
MARA

Cawangan Terengganu

# INFO US\$AHAWAN

usahawan pemacu ekonomi mapan

EDISI  
24  
MAY 2021 APRIL 2022

NO ISSN: ISSN: ISSN 1823-6421

BULETIN ADALAH HAK MILIK KEKAL MASMED UITM CAWANGAN TERENGGANU



# Nasi Ayam Pak Mud, 'Legend' di Merbok!

Nor Azrina Mohd Yusof<sup>1</sup>, Lee Chai Chuen<sup>2</sup>,

<sup>1</sup>Fakulti Perakaunan  
UNIVERSITI TEKNOLOGI MARA Cawangan Kedah

<sup>2</sup>Akademi Pengajian Bahasa  
UNIVERSITI TEKNOLOGI MARA, Cawangan Kedah

Koresponden: [yina1437@uitm.edu.my](mailto:yina1437@uitm.edu.my)

Sumber: Instagram Nasi Ayam Pak Mud

Tidak lengkap pengalaman belajar di UiTM Cawangan Kedah sekiranya anda sebagai seorang pelajar belum pernah mencuba Nasi Ayam Pak Mud, terutamanya sebelum seluruh negara dilanda pandemik Covid-19. Begitulah kiasan yang boleh dikatakan apabila merujuk kepada populariti Nasi Ayam Pak Mud yang terkenal di Merbok, Kedah. Apabila disebut sahaja Nasi Ayam Pak Mud, rata-rata pelajar mahupun staf UiTM mengenali dan pastinya akan teringat-ingat keenakan ayam yang telah digoreng, '(juicy)' berserta sambal hitam yang menjadi rahsia utama kesedapan Nasi Ayam Pak Mud ini. Lokasi kedai yang berdekatan dengan UiTM Kedah dan juga MRSM Merbok, menjadikan kedai Nasi Ayam Pak Mud ini terkenal bukan sahaja di kalangan penduduk sekitar Kampung Langgar, malah di kalangan staf UiTM, MRSM Merbok dan juga pelajar UiTM. Adakalanya, staf-staf UiTM Kedah turut membawa rakan-rakan dari kampus lain untuk merasai keenakan nasi ayam Pak Mud ini apabila mereka bertandang ke UiTM Kedah atas urusan kerja. Justeru itu, keenakan Nasi Ayam Pak Mud ini sentiasa menjadi bualan dan ingatan terutamanya kepada pelajar-pelajar yang telah menamatkan pengajian di UiTM Kedah.

Allahyarham Mahmud bin Dahari, atau lebih dikenali sebagai Pak Mud merupakan pemilik kedai Nasi Ayam Pak Mud ini. Perniagaan Nasi Ayam Pak Mud ini terus berkembang maju walaupun telah beroperasi lebih daripada 15 tahun. Pemergian Pak Mud menemui Pencipta pada 14 Mei 2021 telah meninggalkan kesan yang mendalam kepada para pelanggan kedai kerana Allahyarham Pak Mud seorang yang peramah, baik hati dan mudah mesra dengan pelanggan. Semenjak kesihatan Allahyarham kurang mengizinkan, urusan kedai telah dijalankan oleh anak dan menantu beliau. Kini urusan perniagaan telah diserahkan sepenuhnya kepada anak beliau.

Kedai Nasi Ayam Pak Mud ini beroperasi bermula pada pukul 8.40 pagi sehingga 2.00 petang. Namun, jangan terkejut sekiranya anda bertandang pada pukul 12.00 tengahari, nasi ayam telah habis dijual. Penulis sendiri pernah mengalami kekecewaan tersebut apabila tiba di kedai pada pukul 11.30 pagi, pekerja kedai tengah mengemas dan bersiap-siap untuk menutup kedai. Justeru itu, sekiranya ingin mencuba Nasi Ayam Pak Mud, digalakkan berkunjung ke kedai pada pukul 9.30 - 11.00 pagi.



Sumber: Instagram Nasi Ayam Pak Mud

Berdasarkan pengalaman penulis dan komen daripada daripada pelajar yang gemarkan Nasi Ayam Pak Mud ini, selain faktor murah iaitu sepinggan nasi ayam biasa berharga RM4.00 faktor servis penghantaran yang cepat menyebabkan ramai pelanggan gemar datang ke kedai nasi ayam ini. Di samping itu, pelanggan juga gemar berkunjung ke sini kerana boleh merasai suasana kampung. Sekiranya anda tidak ingin makan di bahagian hadapan kedai, anda boleh memilih untuk makan di bawah pokok yang rendah di belakang kedai sambil menghirup udara segar.

Di sinilah tempat kegemaran Allahyarham Pak Mud selalu duduk sambil bersembang mesra dengan para pelanggan beliau sama ada pelajar, staf mahupun orang kampung.

Semenjak wabak Covid-19 menyerang negara, Kedai Nasi Ayam Pak Mud juga mula mengorak langkah dengan menggunakan perkhidmatan FoodPanda bagi penghantaran makanan. Ini telah memudahkan lagi pelanggan membuat pesanan sambil membantu mengekang wabak Covid-19. Kedai Nasi Ayam Pak Mud juga turut menggunakan medium sosial seperti Facebook dan Instagram bagi tujuan saluran maklumat di mana ianya memudahkan pelanggan mengetahui perkembangan kedai tersebut. Semoga perniagaan Nasi Ayam Pak Mud ini terus berkembang maju dan terus gagah menempuhi cabaran terutamanya dalam menghadapi cabaran Covid-19 ini.

## Rujukan

- [1] [https://www.facebook.com/NasiAyamPakMud/?ref=page\\_internal](https://www.facebook.com/NasiAyamPakMud/?ref=page_internal)
- [2] <https://www.instagram.com/explore/locations/586932639/nasi-ayam-pak-mud/>